

## Flerschem soll noch long lewe

Gessdern hott misch de Schorsch oogerufe unn gefroochd: Honnes, warum werrd donn eischendlich e Stadtfest gefeiert? 60 ist doch koo Zahl, odder?

Isch saach: Schorsch, mir dun joo dess 60-Jährische aach feiern, wennmerr in e paar Johr Diamandene Hochzeit hawwe. Also hott Flerschem jetz die Diamandene Stadterhebung, doo isses rischdisch dess ze feiern. Unn unser Flerschem hott joo aach ebbes ze biete, unn isch denk, dess muss unner die Leit. Weilmerr doch dorsch die Fraport su vill neie Familie in unser Stadt kriecht hawwe. Die hawwe koo Flerschemer Blättche unn dun aach moin „Honnes“ nitt lese, awwer die solle halt emol seh, dass Flerschem mieh hott als Fluchzeuche unn de Krach vunn dene.

Moont de Schorsch: Doodriwwer habb isch aach schunn noochgedenkd. Dess werrd die Uffgab vunn de nächsde Johrn soi, die neie Leit sozesaache uff die onner Seit vunn Flerschem, in die Altstadt, ze bringe, also doohie, wo die Kuldur dehoom iss. Im Flerschemer Keller, in de Kuldur-Scheier, awwer aach in unserne Wertschaffde wie de Herrsch, dess Bootshaus, die Karthaus unn dess Joffche.

Isch frooch: Schorsch, was moonsde, wassmerr mache misst?

Gibt de Schorsch ze Antwort: Isch denk, die missde direkt oogesproche werrn. Mir mache su vill mett de Fronsose, mett de Pole unn seit e paar Johr aach mett de Terrke in Güzelbaatsche, dass merr aach emol su e Art Partnerschaftsverdraach mett dene neie Leit in Flerschem mache missde.

Isch druff: Doo hosde recht, Schorsch. Isch denk, merr kennt ferr die aach enn Kreisel oiweihe odder e Strooß benenne, die missde halt wisse, sie sinn uns genau su willkommen wie unser onnern Partner. Odder merr kennt enn Platz benenne, isch habb schunn effderr mol vorgeschlaache, uffem Axthelm-Gelände enn Brunne ze baue, den kennt merr Brunne der Freundschaft nenne. Dess wär su e Art Treffpunkt, wo merr ab unn zu su Kennelern-Feste feiern kennt.

Seet de Schorsch: Odder de Stadtpark unne omm Moo, doo iss e mords Wiss unn sunnst nix, aach doo kennt merr was mache, vunn de Vereine unn su. Weil bei dene Neie bei uns sinn bestimmt aach Leit, die gern singe odder sunnst was mache deede. Merr misst sich erinnern wie dess gewese iss, doomols, wie die Flischtling hierher kumme sinn. Awwer was denksde, deede die neie Flerschemer aach kumme?

Isch saach: Merr missts emol probiern. Doo kennese mol feststelle, dass merr mett uns Moohesse gut zerecht kumme kann.

Frächt de Schorsch: Odder moonsde die hädde villeischd Ängst, weil mir su geesche den Fluchlärm sinn unn die nix degeesche hawwe, unn die moone, mir deede nix onnersders verzähle als wie immer nor die Sach mettem Krach?

Isch saach nochemol: Merr missts halt probiern. Jetz mettem Fest werrd joo oigelade uff die Grawestrooß unn uff die Wickerer Strooß. Dess iss e gut Geleeschenheit sisch kennezelerne. Unn nitt immer defoo verzähle, wies frieher war. Neie Leit kenne doodemett nix oofonge. Die wolle nitt wisse was gewese iss, die wolle wisse was werrd. Unn doo, su denk isch, muss noochgebessert werrn.

Seet de Schorsch: Oofonge missde merr allminonner. Awwer trotzdem, uff de Stadt misst ooner odder oo soi, die dess iwwernemme dut, su e Art Vereinsbörse, wo die Leit sisch ooschließe kenne unn singe unn Schach spille unn Flerschemerisch babbele, je noochdem wasse gern wolle.

Isch habb gelacht: Enn Integrationsbeufftraachde ferr Deitsche?

De Schorsch hott noch mieh gelacht. Ja, grad ferr Deitsche, awwer aach ferr Leit, die vunn irschendwo her kumme unn hier lewe wolle. Unn lewe iss nitt nor Esse unn Drinke unn Schaffe unn Schloofe, naa, lewe iss mett onnern babbele unn was ze unnernumme. Isch saach: Unn uffem Axthelm-Gelände enn Integrationsbrunne ferr uns all minonner. Doodriwwer kennt merr uffem 60-Jährische babbele.

Weil Flerschem soll noch long lewe!

Eiern Honnes